

IN TAJCUILOLAMATZIN TEN QUITAJCUILOHUILIJ IN TATITANIL SAN PABLO PARA IN TANELTOCANI DE CRISTO TEN CALYETOCQUE CAMPA PUEBLO DE EFESO

Nican Pablo quintajcuilohuilíá
in tocniuhan taneltocani
campa pueblo Efeso desde ne
Roma campa yetoc preso

1 Nejuatzin ni Pablo niitatitanil
de Jesucristo porín ijcón
quimonequiltij Totajtzin Dios.
Huan ijcón tamechtajpaloj nochí
nantocnihuan nantaneltocani
ten nanyolchipauque huan ten
nantacuautamatinemij ihuan Totecotzin
Cristo Jesús, namejuantzitzin ten
nancalyetocque ne Efesojcopaca.
2 Huan xicpixtiyacan namejuan ne
teyolicnelilis huan ne yolsehuilis ten
hualeutoc inahuac Totajtzin Dios huan
ihuac Totecotzin Jesucristo.

Nican tajtoa de ne tatiochihualisme
ten techmaca Jesucristo ica in
chicahualis den Yecticatzin Espíritu

3 Huan ma tcmohuistilican Totajtzin
Dios, huan ma tictasojcamachilican
Yejuatzin Itajtzin de Totecotzin
Jesucristo. Huan Totajtzin Dios
techtatiochihuilij ya ica nochí tataman
tatiochihualisme ten hualehuaj tech

nochi in lugares de ne eluiyactzinco.
Huan ijcón Dios quichiutinemi topán
porín timajsitinemij ihuan Cristo
Jesús. **4** Huan achtopa que tzinehuac
in talticpac, ijcuac Totajtzin Dios
techijitac ma tipoutinemican ihuan
Cristo. Huan no Totajtzin Dios
techijitac que ma tinentinemican
inahuactzinco Yejuatzin tiyolchipauque
huan ma amo titayolmajmahualme
ica tajtacol. **5** Huan Totajtzin Dios
semi techtasojtac. Ica ya nojón
Yejuatzin techijitac desde ne achtopa
ya que ma tejuan timochihuaquij
tiiconehuan de Totajtzin Dios queme
yesquía tiitacpacone huan. Huan
nochi njíñ quichihuac in Totajtzin
Dios ica ihuelilis de Iconetzin
Yejuatzin in Jesucristo, porín
Totajtzin Dios quimonequiltij ma
mochihua ijcón queme Yejuatzin
itanejnequilis. **6** Ica ya nojón tejuan
monequi ticueyimohuistilican in
Totajtzin Dios porín Yejuatzin telsenca
techueyiyolicnelijtinemi. Huan ijcón
ne ihueyiteicnelilis de Totajtzin
Dios, Yejuatzin techtayocolijtoc huan
techualpanmacatoc mosta mosta

porín tejuan tipoutinemij ihuan Itasojconetzin, Yejuatzin in Cristo Jesús.
7 Huan Totajtzin Dios techueiyolicnelij huan techueyitasojtac. Ica ya nojón Yejuatzin quichihuac que ma techmaquixtis Iconetzin cuac Yejuatzin quimimiloj iesyotzin tech in cruz huan ijcón quixtahuac totajtacoluan. Huan ica ne imiquilis de Cristo, Totajtzin Dios techtapojpoluij ya de nochí totajtacoluan.

8 Huan Totajtzin Dios quihueyinextij ya ne iteicnelilis tohuan. Ica ya nojón Yejuatzin techtayocolij ne huelilis para ma tiyectanemilijtinemican huan ma tiyolmajsitinemican. **9** Huan Totajtzin Dios techajsicamatiltij ya ne de Yejuatzin iichtacatamachilisuan ten ichtacayetihualayaj. Huan no techajsicamatiltij ya ne de Yejuatzin itanejnequilis ten quimonequiltá ma mochiuto ica por Cristo Jesús.
10 Huan nijín itaixejecol de Dios, ma mochihuaqui ca nejmach ijcón queme quimonequiltis Dios. Huan no motamichihuaqui itanejnequilis de Dios tech ne tonal ten Dios quitalij ya. Huan tech ne tonal Totajtzin Dios quisentilis nochí tanahuatil imaco Cristo para ma Cristo tayecantinemi ca chicahualis ipan nochí tanahuatilme ten ongac nepa eluiyactzinco. Huan no ma tayecantinemi Cristo ipan nochí tanahuatilme ten ongac nican talticpac.

11 Huan Totajtzin Dios techijitac desde ne achtopa ya para ma tipoutinemican ihuantzin Cristo. Huan Yejuatzin techtemactij imaco Cristo para ijcón timochihuaco tiiherencias de Cristo. Huan nochí nijín mochiutiu porín ijcón quimonequiltij Totajtzin Dios ten quichiutinemi queme Yejuatzin iyolpaquilis huan itanejnequilis.

12 Huan tejuan ne achtopa ya timochiuque titacuautamatini ihuan Cristo para ma tejuan ma ticmohuistilijtinemican Yejuatzin ihuan

icualtziyo ten quipixtinemi Yejuatzin.
13 Huan namejuan no nanquicacque ya ne yec melau tanojnotzalis de Cristo, huan no nanquicacque ne yancuic Tajtoltzin ten caucui ne nemaquixtilis. Huan queme namejuan nantacuautamatque ya ihuan Cristo, ica ya nojón Totajtzin Dios namechteaxcatilico para xiaxcatican queme naniconehuan. Huan nochí nijín Totajtzin Dios quichiutica ica porín in Yecticatzin Espíritu ten Yejuatzin ipa moyectencauca ya de techualtitanilis. **14** Huan Totajtzin Dios techmactilijtinemi in Yecticatzin Espíritu para ma ticyecajsicamatican que ticselithue se cualtzin ajsciaherencia imaco Totajtzin Dios. Huan ticselisque ne nemactil tech ne tonal cuac Totajtzin Dios quintamimaquixtis ya huan mountamiaxcatilis ya nochí itaneltocacahuau. Ica ya nojón ticsenhueyimohuistilisque Totajtzin Dios ica por ichicaucahuelilis tenica techueiyolicnelij.

Pablo quitajtanilía Dios que ma Yejuatzin quinmaca ne yolkmajxitilis ne itaneltocacahuau

15 Huan nejua nicactinemi de queniu namejuan nantacuautamatij ihuan Totecotzin Jesús. Huan no nicactinemi de queniu nanquintasojtatinemij nochí in taneltocani yolchipauque.

16 Ica ya nojón nejua nachipa nictasojcamachilijtinemi Totajtzin Dios ica por namejuan, cuac namechelnamiqui tech ne notatatautilis inahuactzinco Dios. **17** Huan Dios Yejuatzin ne Tayecancatzin de Totecotzin Jesucristo. Huan no Totajtzin Dios quipía nochí ne chicaucahuelilis huan cualtziyo. Ica ya nojón nictajtanilía Totajtzin Dios que ma Yejuatzin ma namechtayocolitiu ne hueyi tamachilisme ten cuicatinemi

in Yecticatzin Espíritu, para ijcón nancajsicamatiyasque in Tajtoltzin de Dios huan para nanquixmatisque cuchi oc Totajtzin Dios. ¹⁸Huan no nictajtanilijtoc Totajtzin Dios que ma Yejuatzin ma namechtahuilijtinemi namotamachilisuan huan namoyolojuan para ma namejuan cuchi oc xicajsicamatiyacan huan xicyolicachixtiyacan ne hueyi yecajscianemaquixtilis tenica Yejuatzin namechnotzac ya. Huan no ma Yejuatzin namechyoltahuili para ma namejuan cuchi oc xicajsicamatican in chicaucacualtziyo de ne herencia ten Totajtzin Dios techmactilis porín tejuan tipoutinemij ihuantzin. ¹⁹Huan no ma Dios namechyoltahuili para ma namejuan xicajsicamatican que semi hueyi ichicahualis de Dios ten amo teyi quinejnehuilía. Huan ne chicahualis de Dios, yejua ne tequititoc tech toyolijtic, nochí tejuan ten titacuautamatij ihuan Cristo. Huan ne chicahualis de Dios, yejua ne quipía huelilis.

²⁰Huan Totajtzin Dios quinextij ne ichicaucahuelilis nican talticpac cuac Yejuatzin quipanquixtij yoltoc in Cristo Temaquixtijque intzalan ánimajme. Huan no Yejuatzin quinextij ne ichicaucahuelilis cuac Totajtzin Dios qatalito que Cristo ma yetinemí iyecmacopaca Yejuatzin campa ichicaucahuelilis tech nochí in lugares de eluiyactzinco. ²¹Huan no Totajtzin Dios quinextij ne ichicaucahuelilis cuac Yejuatzin qatalij que Cristo ma quinyecantinemí nochí tataman ejecame tayecanani. Huan no ma quipía Cristo tanahuatil inpan nochí ejecame tequihuani huan inpan nochí ejecame chihuanime huan inpan nochí ejecame ten tanahuatiani. Huan Cristo Temaquixtijque Yejuatzin ne cuchi hueyi chiuque. Ica ya nojón Yejuatzin tayecantinemí ipan nochí ocsequin chihuanime ten yesqui nintocayuan

ten axcan tequititinemij oso ocsequin chihuanime ten hualasque oc. ²²Huan no Totajtzin Dios quimactilij ya Cristo Temaquixtijque nochí tanahuatil para ma nochí tequihuani ten ongacque ma quitacamatican Cristo Jesús. Huan no Totajtzin Dios qatalij ya que Cristo Jesús ma yesqui in tayecanque ipan nochí ten ongac huan no ma tayecantinemí ipan nochí itaneltocacahuán. Huan ijcon Cristo Temaquixtijque Yejuatzin quinyecantinemí nochí itaneltocacahuán ijcon queme se totzontecon quiyecantinemí toomiyohuan den totacayo. ²³Huan tejuan tipoutinemij ihuan Cristo queme se toomiyohuan senmajsitinemí tech nochí totacayo. Huan Cristo Temaquixtijque Yejuatzin ne techyolpxexontijtinemi tejuan tiitaneltocacahuán ica nochí tataman ten tejuan techpoloaj. Huan no Cristo quipexontijtinemi ica inemilis nochí ten ongac.

Nican tajtoa de queniu Totajtzin Dios techmaquixtía ica por ne iteicnelilis

2 Huan Totajtzin Dios Yejuatzin namechmactilij ya ne yancuicanemilis cuac Yejuatzin quipanquixtij ya yoltoc intzalan in ánimajme in Cristo Temaquixtijque. Huan ijcon quichihuac Totajtzin Dios cuac namejuan nanyolmiqueme de namotalnamiquilis ica por namotajtacol tenica nanmotajtacolmactihualajque.

2 Cuac nojón tonalme, ijcuacón nannentinemíaj tech in tajtacol. Huan no nanmohuicatinemíaj ica tajtacol ijcon queme in talticpacuani quichiutinemij. Huan no nanquitacamatinemíaj ne tayecanque amocuali ejecat, ten monotza Satanás, ten axcan taquitzquijtoc ne ejecaxco huan nican talticpac. Huan ijcon ne Satanás cuchi oc quinyoltequitilijtoc

nochi neques ten axcan quixnamictinemij Totajtzin Dios. ³Huan no ijcón tejuan tinochin tinentinemíaj ica tajtacol cuac nojón tonalme tejuan timoyolpactijinemíaj, ijcón queme totanejnequilis de tajtacol techuicaya. Ijcuacón timohuicayaj ijcón queme tejuan totanejnequilis techtequitiltiaya. Huan no tinentinemíaj ijcón queme tejuan totamachilisuan san techyoltanemililtiayaj. Ica ya nojón technamiquá ma ticselican ne hueyi tatzacuiltis de Dios, ijcón queme monequi quiselisque nochí in talticpacuani.

⁴Huan Totajtzin Dios tel hueyi techyolicnelij huan no semi techyoltasojtac. ⁵Huan masqui tejuan tiyolmictinemíaj de totalnamiquilis ica totajtacoluan tenica timotajtacolmacacque ya, pero Totajtzin Dios techpohua que techsenmactilij ya ne yancuicanemilis ihuan Cristo cuac Yejuatzin quipanquixtij Cristo yoltoc intzalan in ánimajme. Ica ya nojón xicmatican que Totajtzin Dios namechmaquixtij ya sayó ica ne iteicnelilis. ⁶Huan Totajtzin Dios techpohua que techpanquixtij tiyoltocque intzalan in ánimajme tech ne tonal cuac Yejuatzin quipanquixtij yoltoc in Cristo Temaquixtijue. Huan no Totajtzin Dios techpohua que techtalito ihuan Cristo tech in lugares de eluiyactzinco porín ihuantzin tipoutinemij ya. ⁷Huan Totajtzin Dios quichihuac nochí nijín por tejuan para ijcón tech ne tonalme ten hualasque oc, ma tictenextilijtinemican de queniu Yejuatzin techueytasojtac. Huan ma titenextijtinemisque de queniu Yejuatzin techyolicnelij porín tipoutinemij ihuan Cristo. ⁸Huan ica por ne iteicnelilistzin Totajtzin Dios namechmaquixtij ya porín namejuan nantacuautamatinemij inahuactzinco Cristo. Huan namejuan amo teyica

huelic nanmomaquixtijque. Ta, Totajtzin Dios namechmactilij ya nijín nemaquixtilis. ⁹Huan Totajtzin Dios amo namechmaquixtij ya ica por tensá chihualis ten namejuan nanquichiuque. Ta, Dios namechmaquixtij ya sayó porín Yejuatzin namechyolicnelij. Ica ya nojón amo aquen huelis mohueyimatis huan quiyolmachilis que yejua san huelis momaquixtis. ¹⁰Huan nochí tejuan tiitachijchihualuan de Totajtzin Dios. Huan Totajtzin Dios techchijchihuac ya para ma tipoutinemican ihuan Cristo huan para ma ticchiutinemican ne cuali tatacamatilis de Dios. Huan achtopa que tiyanucuicayolque ya, Totajtzin Dios ipa quitalij ya que ma ticchiutinemican nochí nijín cuali chihualisme huan tatacamatilis.

Totajtzin Dios moyoltalij tohuan porín Cristo quixtahuac ya totajtacoluan

¹¹Huan ijcón xiquelnamictiyacan namejuan de queniu nanmohuicatinemíaj ne achtopa ya, namejuan ten amo nanopoutinemij queme pueblojuani judíos. Huan namejuan amo namechnescayotijke tech namonacayo queme ne judíos quichiutinemij. Pero tejuan ten tipueblojuani judíos, tejuan technescayotijke tech tonacayo. Ica ya nojón tejuan tamechtocaytiyaj nantaca ten amo tanescayotilme ten quijtosnequi tagayot ten amo judíos. ¹²Huan xiquelnamictiyacan que tech nojón tonalme namejuan amo nanopoutinemíaj ihuan Cristo huan amo no nanmajositinemíaj queme nanopueblojuani de Israel. Huan namejuan amo no nanquimatíaj ne tenilil tenica Totajtzin Dios moyectenahuac ya de quichihuati, de que se tonal Totajtzin Dios caultitanis Cristo Temaquixtijue nican talticpac.

Huan namejuan nannentinemíaj nican talticpac huan amo nanquichiayaj cox hualas Cristo Temaquixtijque para namechmaquixtis. Huan amo no nanquixmatía in Totajtzin Dios ten yoltica. ¹³Pero axcan nanmajsitinemíj ya ihuan Cristo Jesús, masqui namejuan ne tonalme ya nannemíaj huejca de Dios. Pero axcan Totajtzin Dios namechualtoquito ya para xipoutinemican ihuan Cristo. Huan nochí njíjn quichihuac Totajtzin Dios ica por Cristo Jesús ten momiquilij huan quimimiloj niesyotzin para ijcón quixtahuas totajtacoluan.

¹⁴Huan cuac Cristo momiquilico, ijcuacón Yejuatzin quichihualtij que ma amo ongac oc ne tehuilis tenica motehuijtihualajque in taca judíos ihuan in taca ten amo judíos. Huan Cristo quinsentilij ya sansé san in pueblojuani de neques ten mopoutinemíaj judíos huan neques ten quipoutinemíaj amo judíos. Porín Cristo quihuejueloj ya ne hueyi yoltahuelitalis tenica moxejxelijinemíaj in tagayot judíos huan in tagayot ten amo judíos. ¹⁵Huan cuac Cristo momiquilij tech in cruz, ijcuacón Yejuatzin quitamiltij ya ne tanahuatil de Moisés ten cualcuía míac tataman tanahuatilme huan tamachtilisme. Huan no cuac Cristo momiquilij tech in cruz, ijcuacón Yejuatzin quinsentilij ne ome pueblome, ne ten judíos huan neques ten amo judíos. Huan ijcón Yejuatzin quichihuaco se yancuic pueblo. Ica ya nojón nochí ne ome pueblome poutinemíj sayó sansé san ihuan Cristo. Huan ijcón Yejuatzin quinyoltalico nochí ne pueblojuani ma amo moyolcualantijtinemican oc se huan ocsé. ¹⁶Huan cuac momiquilij Cristo tech in cruz, ijcuacón Yejuatzin quitamiltij ne netehuilis tenica in pueblojuani judíos motahuelitztinemíaj ihuan in tagayot ten amo judíos. Huan

ijcón Cristo quinsentilij ne ome taman pueblojuani ma mochihuacan sansé san pueblojuani. Huan no Cristo quichihuac que Totajtzin Dios ma moyoltali ihuan in talticpacuani, masqui yejuan tagayot judíos oso masqui tagayot ten amo judíos. Huan Cristo Jesús quichihuac ma Totajtzin Dios ma moyoltali ihuan in talticpacuani cuac Yejuatzin momiquilij tech in cruztzin huan quinxtahuilij nochí nintajtacoluan.

¹⁷Huan cuac Cristo Temaquixtijque hualajca nican talticpac, ijcuacón Yejuatzin pehuac quitetapohujtinemíaj de ne yancuic Tajtoltzin de Dios ne ten cuaclui yolsehuilis. Huan ijcón Cristo techtapohuico tejuan tijudíos ten amo huejca tinentinemíaj de Dios. Huan no ica por tejuan Cristo namechtauhuito namejuan ten amo tagayot judíos huan namejuan melau huejca nannentinemíaj de Dios. ¹⁸Huan ica por ne imiquilis de Cristo nochí tejuan huelis timotoquisque ihuantzin Totajtzin Dios, masqui tejuan tijudíos oso masqui namejuan amo nantagayot judíos. Huan in Yecticatzin Espíritu, Yejuatzin ne ten tequititinemi que tejuan ma timotoquitij ihuan Totajtzin Dios.

¹⁹Ica ya nojón namejuan amo nananaltecocayome oc tech se pueblo ten amo namotaaxcayan oc. Ta, axcan namejuan no nanopoutinemíj ya ihuan Dios ijcón queme nochí in ocsequin itaneltocacahuán poutinemíj ihuan Dios. Huan ijcón timochihuacoj tiupueblojcahuán de Dios, nochí tejuan ten tiitaneltocacahuán de Dios. ²⁰Huan namejuan nantamatij queme yesquía se nepancal. Huan ijcón queme in tepan tzinehuac se cuali tatzinehualoni, no ijcón namejuan tzineutoc namotacuautamatilis tech ne tamachtilis ten namechnextilique ya ne itatitaniluan de Cristo huan ne tanahuatiani de Dios. Huan

Cristo Jesús Yejuatzin ne queme yesquía se tet ten tachicahualtijtoc ojcampá.²¹ Huan ijcón ne tet ten tachicahualtijtoc ojcampá, yejua ne ipan quinejnepanotij ca nejmach nochí in ocsequin teme para ijcón nochí cuali ajactos. Huan tejuan como totacuautamatilis tzineutoc itech Cristo, ijcuacón Yejuatzin techtatequiutijtu queme tejuan titeme para ijcón quichihuati se tamelahuac nepancal ten caultzin chipahuac campa Totajtzin Dios yetinemis. Huan nochí tejuan tiitaneltocacahuan de Dios timochihuacoj ya se tamelahuac nepancal porín timajxitinemij ihuan Cristo Jesús.²² Huan no ijcón namejuan nanmajxitinemij ihuan Cristo. Huan no ijcón namejuan nanmosentilíaj sansé san ihuan ocsequin itaneltocacahuan de Dios. Huan ijcón tinochin ticmajxitijtiyohue se tamelahuac nepancal campa Totajtzin Dios calyetoc ica ihuelilis den Yecticatzin Espíritu.

Totajtzin Dios quitequimactilij Pablo para ma yejua quinnojnotztinemiti in tagayot ten amo judíos ica in Tajtoltzin de Dios

3 Huan nejua ni Pablo nechtzacque queme preso porín nitequititinemi ica por Cristo huan porín namechtaneltoctijtinemi namejuan ten amo nanjudíos. Ica ya nojón nimotatatautilijtoc iixpantzincó Dios ica por namejuan.² Huan namejuan cuali nanquimatzque ya que Totajtzin Dios ica iteicnelilis nechtequimactilij ya que ma nitanojnotztinemi ica in Tajtoltzin de Dios ten cuelcui ne nemaquixtilis. Huan ma nitequititinemi namejuan namotzalan ten amo nanopoutinemij queme judíos.³ Huan cuali nanquimatzque sayó Totajtzin Dios nechnextilij ya huan cuali nechajsicamatalij ya njín tamachilis ten ne achtopa ya motaatijtihualaya,

ijcón queme namechijcuilohuilijca ya tepitzin ya.⁴ Huan cuac namejuan nanquileeroaj njín amat, ijcuacón nancajsicamatique que nejua cuali nictmatoc ya njín tamachilis den tequit ten Cristo quitamichihuac ya, masqui njín tamachilis motaatijtihualá.

⁵ Huan ne nojón ocsequin tonalme amo aquen tagat cajscamatque de ne tequit ten Cristo quitamichihuati. Pero axcan Totajtzin Dios nochí techonmonextilij ya ne itequiu de Cristo toixpan tejuan in yolchipauque tiitatitaniluan de Cristo; huan no quinonmonextilij inixpan in tanahuatiani de Dios.

Huan njín quinonmonextilij sayó ica ichicahualis den Yecticatzin Espíritu.

⁶ Huan ne tamachilis de Dios yejua njín ten motaatijtihualaya, ne Tajtoltzin de Dios technextilá que in tagayot ten amo poutinemij queme judíos, yejua nojonques quiselisque nemactil de nemaquixtilis ijcón queme in tagayot judíos quiselisque. Huan ica por ne Tajtoltzin de Dios, in judíos huan in tagayot ten amo judíos, nochí yejua senpoutinemisque ihuan Cristo. Huan nochí yejua no quiselijtiyasque ne nemactil, ijcón queme Totajtzin Dios moyectencahuac ya de que Cristo cuelcui nojón nemactil. Nochi njín mochihuaco ica por ne Tajtoltzin de Dios ten cuelcui ne nemaquixtilis.

⁷ Huan ijcón Totajtzin Dios nechtequimactij ya ma nitanojnotztinemi ica ne Tajtoltzin ten cuelcui ya Cristo. Huan ijcón quichihuac Totajtzin Dios porín nechyolicnelij huan nechayocolij ihuelilis para nicchiutinemis njín tequit.

⁸ Huan ijcón Dios nechtequimactij ya ica njín tequit, masqui nejua amo teyi nichiuque huan amo nicpixtinemi chicahualis queme ne ocsequin itaneltocacahuan yolchipauque de Cristo. Pero Totajtzin Dios ica ne iteicnelilis nechtequimactij ya ica njín tequit

de que nejua niquinnojnotztinemi ne tagayot ten amo judíos ica ne Tajtoltzin ten cualcui huel míac tatiochihualisme de Cristo. Huan ne tatiochihualisme de Cristo amo huelis se quinajsicapohuas. ⁹Huan no Totajtzin Dios nechtequimactij ya que nejua ma niquinyecajscamatilti nochí tagayot de ne tamachilis de Dios ten ipa motaatijtihualaya desde ne tonal ya. Huan nochí nijín mochiutoc porín sayó Yejuatzin quichichihuac nochí ten ongac. ¹⁰Huan Totajtzin Dios quimonequiltijtoc ma ixnestiu que tinochin timochihuacoj sansé san tiipueblojcahuán de Dios. Huan no Dios quimonequilitjtoc que ma moyecajscamatican de queniu tataman mochiutoc itamachilisuan de Dios nochí neques tayecanani ten tayecantinemij huan ten quipixtinemi huelilis tech in lugares de ne eluiyactzinco.

¹¹Huan nochí nijín quichihuac Totajtzin Dios ijcón queme Yejuatzin quimonequiltij desde achtopa que tzinehuac in talticpac. Huan Yejuatzin quitalijtihuitz que ma nochí nijín ma mochiuti tech inemilispan de Cristo Jesús ten Totecotzin.

¹²Huan tejuan titacuautamatque ya ihuan Cristo. Ica ya nojón ticpíaj hueyi yolchicahualis para ijcón timotoquisque inahuactzinco Totajtzin Dios ica ne totacuautamatilis ten ticpíaj tech Cristo.

¹³Huan nejua axcan nitajyohujitoc ica míac tataman tajyohuilisme porín nejua namechonnojnotztinemic ica in Tajtoltzin de Dios. Ica ya nojón, masqui nitajyohujitoc, pero nejua namechontatautía oc que amo ximoyolcuezcuepacan tech namotacuautamatilis. Porín nochí nijín notajyohuilisuan quichihua que ma onca se hueyi cuij para namejuan.

Nican tajtoa de ne hueyi tetasojtalism de Cristo Temaquixtijque

¹⁴Huan queme cualtzin Dios techtatiochihuilijtoc, ica ya nojón

nimatancuaquetzac inahuactzinco Totajtzin Dios, de Yejuatzin Itajtzin de Totecotzin Jesucristo. ¹⁵Huan como ongac se naquen Tohueyitajtzin, ica ya nojón tejuan ticuij ne tocayit de Totajtzin Dios para tiquintocaytíaj totatuan nican talticpac ijcón queme quichiutinemi nepa eluiyactzinco. ¹⁶Ica ya nojón nictajtanilía Totajtzin Dios ma namechmaca huelilis huan chicahualis tech namoyolijtic ica por ne itequiu den Yecticatzin Espíritu. Huan ne huelilis huan ne chicahualis hualeutoc de ne campa imohuiscahuélilispán de Dios campa itacualtziyojan de Yejuatzin. ¹⁷Huan ma Totajtzin Dios ma quichihuali que in Totecotzin Jesucristo ma calyetinemi namoyolijtic ica por namotacuautamatilis de Cristo. Huan no Totajtzin Dios ma quichihua que namotacuautamatilis ma tzineuto tech in tetasojtalism huan ma huejcatan naluayoto tech in tetasotalis, ijcón queme se cuoutactzon monaluayocuitu huejcatan. ¹⁸Huan no nictajtanilía Totajtzin Dios que ma namechmacatiu ne ajscicahuelilis para xicyecajscamatican ne hueyi tetasojtalism de Cristo, para nancajscamatique de queniu mohueyisoutoc ne tetasojtalism huan de queniu mohueyiltijtoc huan de queniu huejcatan ajsis huan de queniu huejapan ajsis ne itetasojtalism de Cristo. ¹⁹Huan no namechteixpantijtoc inahuactzinco Totajtzin Dios que ma xicyecajscamatican huan xicyolmachilijtiyacan ne tetasojtalism de Cristo masqui melau amo quemar huelis ticyecmatisque hasta can tantoc ne tetasojtalism de Cristo. Huan cachi oc ma namoyolijtic ma pexonto hasta ma mimilauto ica ichicahualis de Yejuatzin ten Totajtzin Dios namechmacatoc.

²⁰⁻²¹Huan axcan ticueyimohuistilíaj Totajtzin Dios, porín Yejuatzin quipixtinemi ne chicaukahuelilis

para ica quichihuas nochí ten tejuán ticontajtanicusque. Huan Yejuatzin no quipía huelis para ica quichihuas cachi oc ne ten tejuán ayamo ticnemilíaj ticontajtanicusque. Huan Totajtzin Dios quichihuati nochí ten ticontajtanicúaj ica ne ichicaucahuellilis ten axcan tequititinemi tech toyolojuan. Huan monequi ma ticueyimohuistilican Totajtzin Dios. Huan nochí in tocnihuán taneltocani ma quihueyimohuistilican Totajtzin Dios ica por ne tequit ten inpan Yejuatzin quichihuac. Huan monequi tinochin ma ticueyimohuistilican Totajtzin Dios ica por ne tequit ten Yejuatzin quichihuaco ica por Cristo Jesús. Huan ijcon ma ticchiutinemican sen nachipa huan sen nachipa. Huan ma ijcon mochihuá. Amén.

**In Yecticatzin Espíritu
techsentilijtinemi sansé san nochí
tiitaneltocacahuán de Cristo**

4 Huan nejua ni Pablo nechtzacque ya que me preso porín nitanojnotzinemía ica in Tajoltzin de Totecotzin. Huan no namechtatautía nochí namejuán que xichipaucanemican ijcon que me quinnamiqui ma chipaucanemican neques ten Totajtzin Dios quinnotzac ya ma quitoctilican Yejuatzin.

2 Huan melau Totajtzin Dios namechnotzac ya que xinentinemican ica ne yolyemanalis huan amo ximohueyinctinemican. Huan xiquinpialijtu paciencia in tocnihuán taneltocani. Huan ica por ne tetasojtalís ten Yejuatzin namechmacatoc, ximoxicohuilijiyacan ne yolkocolilis ten namechihuillíaj ocsequin. **3** Huan ximofuerzajuican de que nachipa ximohuicatinemican se huan ocsé ica sansé san yoltamachilis. Huan no in Yecticatzin Espíritu namechpalehuijitu para nachipa xicpixtinemican ne

yolsehuilis se huan ocsé. **4** Huan nochí tejuán ten tiitaneltocacahuán de Cristo, tisenpoutinemij sansé san. Huan no ongac sayó se Yecticatzin Espíritu. Huan no ongac sayó se Temaquixtijque ten ticyolicachixtocque ma mohualuicas. Huan Totajtzin Dios techijitac ya huan technotzac ya para ma ticyolicachixtocan ne Temaquixtijque ma mohualcuepas. **5** Huan ongac sayó se Totecotzin; huan no ongac sayó se tacuautamatilis ten yec melahuac. Huan no ongac sayó se taahuilis. **6** Huan no ongac sayó se Dios huan njín Yejuatzin in Totajtzin de nochí in taneltocani. Huan Totajtzin Dios momasoutoc topan tinochinme. Huan Totajtzin Dios tequititinemi totzalan tinochin. Huan no Totajtzin Dios yetinemi tech toyolijtic tinochin tiitaneltocacahuán.

7 Huan masqui tisenpohuij, pero Totajtzin Dios techmajmactilijtoc cada senme de tejuán sejsé huelilis ijcon queme Totecotzin Jesús quixejeoco ma ticipixtinemican njín huelilis. **8** Ica ya nojón quijtoa in Tajcuilolamatzin ijcuín:

Cristo tejcoc ya ne eluiyactzinco huan quinuiyac nochí neques taneltocani ánimajme ten olochyetoyaj quichixtoyaj Cristo. Huan ijcon Cristo quinmajmactilij huelilisme ne tagayot taneltocani de nican talticpac.

9 Huan njín tajtol de que Cristo tejcoc ya hasta ne eluiyactzinco, yejua nojón quijtosnequi que Cristo achto temoc ya hasta ne huejcatan de nican talticpac campa tzactocque in ánimajme. **10** Huan in Cristo ten temoc, Yejuatzin ne in mismo Cristo ten ocsepa tejcoc hasta nepa campa cachi huejapan de njín eluiyac. Huan ijcon quisohuaco Cristo nichicaucahuellilis nohuiyan nican talticpac huan nohuiyan nepa eluiyactzinco.

11 Huan Cristo techmajmactilij huelilis cada senme de tejuán. Huan

ijcón sequin taneltocani quiselijque ya huelilis para tequititinemi queme titatitanilme de Cristo. Huan Cristo quinmactilij ocsequin tocnihuán in huelilis para quiselijtiyasque tanahuatilme ten hualeutoc imacotzinco Dios. Huan ocsequin taneltocani quiselijtiyasque huelilis para tanojnotztinemisque ica ne tajtolis ten cualcui ne nemaquixtilis. Huan ocsequin taneltocani quiselijtiyasque huelilisme para quinyecantinemi huan quinmactijtinemi in taneltocani. ¹²Huan Totajtzin Dios quinmactilij njíjn huelilisme para ijcón huelis moyolmajxitisque cachi oc nochi itequitacuhan de Cristo. Huan cuac yejuan moyolmajxitojtosque ya, ijcuacón yejuan ma quinymajxitijiyacan cachi oc ocsequin taneltocani. Huan ijcón nochi in taneltocani ten poutinemij ihuan Cristo, yejuan nojonques ma ajscicatacuaутamatican ihuan Cristo.

¹³Huan Totajtzin Dios quimonequiltá que cachi tejuan ma timoyolmajxitican para ijcón ma tisennentinemican, huan no para ma tisentacuaутamatinemican ihuan Cristo, huan ijcón ticonyecajsicaixmatisque Iconetzin. Huan como ijcón timochihuatiij, ijcuacón timoyolyecmajxitij huan ticyecmatitihue ya in chipaucanemilis de Cristo ijcón queme Yeyuatzin quichiutinemic nican talticpac. ¹⁴Huan ma amo tinentinemican queme se yancuic taneltocacque ten ayamo yec yolmajsitinemi ica itacuautamatis. Porín neques ten ayamo yolmajsij, yejuan nojonques motecahuiláj que ma quinuiyacan tech míac tataman tamachilisme de tacajcayahualis, ijcón queme in ixihuiyo den cuohuit cuitiquisa huan quipatanaltíia in ejecat. Huan ijcón in yancuic taneltocani mohuetziltíia tech nintacajcayahualis de ne tamachtiani ten tanextilijinemij

ica hueyi tacajcayahualis sayó para quinuicasque in tacaquini tech in tajtacolopan ten tecuatapololtía. ¹⁵Ta, namechilía cachi cuali ma titanojnotztinemican ica ne melahuac Tajtoltzin de Dios. Pero nochi njíjn ma ticchiutiyyacan ica ne yoltetasojtalís. Huan ijcón timoyolmajxitisque huan tiyecmajsitinemisque ihuan Cristo Jesús porín Yejuatzin totayecancau huan techyecantinemi ijcón queme techyecantinemi totzoncon. ¹⁶Huan tejuan tiitaneltocacuhan de Cristo huan tipoutinemij ihuan Cristo ijcón queme nochi toomiyohuan poutinemij ihuan totacayo. Huan nochi toomiyohuan cuali sasaliutoc huan ijcón cuali sentequititinemij huan mosenpajpalehuijtinemij tech tonacayo. Huan no ijcón mochiutinemi totech nochi tejuan ten titaneltocani. Huan tisenpoutinemij huan tisentequittinemij huan ma timospaenpalehuijtinemican ihuan Cristo. Huan cada senme de tejuan timotequiltijtinemij ijcón queme Dios techmactilij ya huelilis. Ica ya nojón nochi tejuan timoyolmajxitiyohue ica totacuaутamatis huan timosenpantasojtatiyohue.

Nican tajtoa de que tejuan ticpixtinemij se yancuic nemilis porín tipoutinemij ihuan Cristo

¹⁷Huan namechilía huan namechtequimactilíia ica ichicahualis den itocaytzin de Totecotzin Cristo ijcúin: Ma amo cachi oc xinentinemican queme neques ten amo quixmatij Totajtzin Dios, porín yejuan sayó nentinemij tech nintanejnequilis ten sayó nencajti san. ¹⁸Porín yejuan amo quipixtinemij ne chipaucanemilis ten hualeutoc de Dios. Ta, yejuan nintamachilis cachi oc tequititoc oc tech ne tayohuayanilot ten cuica tajtacol. Huan yejuan amo quixmatij quenin

tamati Dios porín moyolchicautinemij
cachi oc tech in tajtacol.¹⁹ Huan
neques ten amo quixmatij Dios, yejuan
nojonques amo quimachiláj oc in
pinahualis den motajtacolmacatinemij.
Ica ya nojón yejuan motemactijque
ca nochí nintajnejnequilis ma
mocalaquican tech míac tataman
ten amocuali tachihualisme. Huan
yejuan sayó quiyolnejnequij de
mopitzotilijtinemisque tech
nintacayo ica ne ahuilnemilis.²⁰ Pero
Totecotzin Jesucristo Yequatzin
amo ijcón namechmachtico que
xinentinemican tech in tajtacol.²¹ Huan
cuali nicmati que melau namejuan
nanquicaquilijque ya itamachtilisuan
de Cristo. Huan no cuali nicmati que
melau namejuan namechmactijque
ya in melahuac Tajtoltzin de Dios
ijcón queme tamachtijtinemic in
Cristo Temaquixtijque.²² Huan
axcan ximoquixtilijtiyacan ne
namosolticalnamiquilis de tajtacol
huan xicsecocautiyacan ne pitzotic
nemilis ten nancualcuitihuayaj
ne achtopa ya. Porín ne soltic
talnamiquilis, yejua ne quichicahaultfá
ne namotanejnequilis ten
quimajmautihuitz ya ica tajtacol. Huan
namejuan ipa nannentinemíaj tech in
tajtacol porín nammocajcayautihuitze
ica namotanejnequilis ten
amocuali.²³ Huan namejuan
monequi ximoyancuicatalijtiyacan
ica cuali tech namoyolojan huan
tech namotanemilisuan.²⁴ Huan
ximotaquentijtiyacan ica ne
yancuicatalnamiquilis ten Dios qitalij
moyolijtic cuac namechyancuicayolitij
ya. Porín ne yancuic talnamiquilis
quinejehuila Dios iyolchipahualis.
Huan ica ne yancuic talnamiquilis
xicnextijtiyacan ne chipaucanemilis ica
nochí ne yolchipahualis.

²⁵ Ica ya nojón xicsecocautiyacan
nochí tataman xolopijyot. Huan axcan

monequi xitajtojtinemican sayó ica ten
melau ihuan nochí namochanchahuan
porín nochí tejuan tisenpoutinemij
huan tisenmajtsitinemij ihuan Cristo
Jesús.²⁶ Huan como nanyolcualanij,
ijcuacón amo ximotajtacolmacacan.
Huan namocualanyo ma amo
xicpixtinemican nochí se tonal hasta
pancalaqueis in tonaltzin.²⁷ Huan no
namechilía que amo xictacahuilican
in amocuali Satanás ma tequititinemi
ica por namocualanyo.²⁸ Huan naquen
tachtectinemía, yejua ne ma quicautiu
ya nitachtequilis. Huan cachei cuali ma
motequitilti ca imahuan tech se cuali
tequit para ijcón huelis quinpalehuis
ocsequin ten quipolojtinemij ten
cuasque.

²⁹ Huan ma amo xictenpanhuetzocan
se tajtol ten pitzotic huan ten
nencajitic san. Ta, xictequitiltican
namonenepil ica sayó ten cuali para
ijcón cachei oc nanquinyolmajxitisque
in tacaquini huan para no
nanquintiochihiwasque ne naquen
namechcaquilijtinemisque.³⁰ Huan
amo xictayocoltican in Yecticatzin
Espíritu ten Dios namechmactilij
ya ma yetica namoyolijtic. Porín
Totajtzin Dios namechtayocolij
in Yecticatzin Espíritu huan ijcón
namechnescayotij ya para ixnestinemí
ihuan Dios hasta in tonal cuac Dios
namechtamimaquixtiquiu ya.

³¹ Huan no namechilía que
ximosecocautiyacan de nochí
ne yolchichicayot huan ne
yolcualanilis huan ne tahuelot.
Huan no ximosecocautiyacan de ne
mohuispololis huan ne huijuicaltilis
huan nochí ten míac tataman tajtolme
ten teyolxocolía.³² Ta, namechilía
que ximopalehuican ica tetasojtalís se
huan ocsé. Huan xiquinicnelicán se
huan ocsé. Huan no ximotapojojpoluican
se huan ocsé ijcón queme Totajtzin

Dios namechtapojpoluilij ya namotajtacoluan porín nanopoutinemij ihuan Cristo.

Monequi xichipaucanemican porín namejuan nanteconehuan de Dios

5 Huan Totajtzin Dios semi namechyoltasojta porín naniconehuan ya. Ica ya nojón monequi xiyolchipauque ijcón quemé Yejuatzzin yolchipahuac. **2** Huan ma timoyoltasojtatinemican se huan ocsé ijcón quemé Cristo Jesús techyoltasojtatinemi. Porín Yejuatzzin quitenextij itetasojtal is cuac motemactij ma quimictican por tejuan totajtacoluan. Huan momiquilij Cristo ijcón quemé miquic se ichetatzin cuac quimictijque para quimohuistilisque Dios. Huan cuac Cristo Jesús momiquilij huan quixtahuac totajtacoluan, ijcuacón Yejuatzzin mochihuaco quemé se temactil ten quiyolpactij Dios.

3 Huan quemé namejuan nanopoutinemij ihuan Dios, amo namechnamiqui oc de nanmonojnotzasque de nojón ahuilnemilis huan de ne nemilis ten temajmahua ica tajtacol. Huan amo no xiquelnamictinemican de ne xijxicuinyot. **4** Huan amo xitajtojtinemican ca nojón tajtolme ten tepinautíaj. Huan amo no xielihuistajtojtinemican huan amo no xicamanalojtinemican ica in pitzotic tajtolme. Porín nochí nijín tataman tajtolis amo namechnamiqui namejuan de xicchiutinemican. Ta, cachí cuali xictasojcamachilihiyacan Totajtzin Dios ica nochí namotajtoluan. **5** Huan namejuan cuali xicmatocan ya nijín: nochí neques ten cuicatinemij se nemilis ten momautoc ica tajtacol, yejuan nojonques amo no calaquithue tech ne chipaucanemilis de Dios quinyyolyecantinemi ica

ichicahualis. Huan no namechilfá como acsá namicuani ya huan ocsepa mocalaquitinemij ihuan ocsé namicuani, ijcuacón yejuan amo huelis pohuitihue tech ne yancuicanemilis de que Totajtzin Dios huan Totecotzin Cristo quinyyolyecantinemi ica ihueyihuelilis. Huan neques ten quinejnectinemij san den teaxca san, yejuan nojonques amo no calaquithue tech ne tatacamatcanemilis de que Dios quinyyolyecantinemi. Porín nijín ne xijxicuinyot, yejua ne quinejnehuilía ijcón quemé cuac se quinmohuistilía tatadiosme.

6 Huan ma amo aquen namechyolcajcayahua ica tajtolme ten nencajtic san. Porín xicmatican que ne chicahuac tatzacuilitilis de Dios huetziquiu ipan nochí tagayot ten amo quitacamatinemij Totajtzin Dios, porín yejuan sayó mohuelitzinemij tech nochí tataman pitzotic nemilis.

7 Ica ya nojón namechnajnahuatía que amo ximohuicatinemican inuan neques ten sayó quichiutinemij tajtacol. **8** Huan namejuan ne achtopa ya nannentinemíaj tech ne tayohuayanilot ten cuica in tajtacol. Pero axcan namejuan nanopoutinemij ihuan Totecotzin Cristo huan nannentinemij ica ne Tajtoltzin de Dios ten tatanextía. Ica ya nojón namejuan xiyeccchipaucanemican porín nanopoutinemij ya tech in Tajtoltzin de Dios ten sayó tatanextía. **9** Huan ica por ne tanextzin de Dios in Yecticatzin Espíritu quichiutinemíi namoyolijtic ma onca sayó ten cuali, huan ma onca sayó ten melahuac, huan ma onca sayó ne chipaucanemilis.

10 Huan ximofuerzajuican de ximomachtican de ne chipaucanemilis tenica ticyolpactíaj Totecotzin Cristo. **11** Huan amo ihuan xicmanelojtinemican ne chihualisme ten sayó nencajti

san, ten quichiutinemij neques ten nentinemij tech ne tayohuayanilot de tajtacol. Ta, cachi cuali namejuan xiquintenextilican ica in tanextzin de Tajtoltzin de Dios que amo teyi cualtíaj ne chihualisme ten cuicaj tajtacol.¹² Porín tepinautfa cuac tejuan ticteneutinemisque chihualisme ten cuicaj tajtacol ten quichtacachiutinemij neques ten amo taneltocani de Dios.

¹³ Pero cuac Totajtzin Dios quintenextía ica Itajtoltzin nochí ne chihualisme ten cuacluij tajtacol, ijcuacón nojón chihualisme moyecnextiquij que semi temajmahuaj ica tajtacol. Porín in tanextzin de Tajtoltzin de Dios quiyecetenextía ya que nochí hualeutoc imaco in amocuali Satanás.

¹⁴ Ica ya nojón tiquijtoaj ijcuún:
Tejua queme yesquía ticochtinemi,
nimitzilá que xiixpetani, tejua,
huan niman ximoajocui intzalan
neques ten yolmictinemij tech in
tajtacol.

Huan ijcón Cristo mitzyoltahuilis
ica Itajtoltzin.

¹⁵ Ica ya nojón namechilá que monequi ximoyoltatemolican ca nejmach de namochipaucanemilis. Huan amo xinentinemican queme neques yolmijmiquilome ten amo moyolnemilijtinemij de ne ninyalis. Ta, namejuan xinentinemican queme nancuatamatcanemini ica Itajtoltzin de Dios.¹⁶ Huan no namechilá que amo xicahuilojtiyacan san in tonalme. Ta, xitequititiyacan cada tonal ca nejmach. Porín njín tonalme campa tinentinemij, yejuan nojonques cachi oc momajxitiji ica tajtacol.¹⁷ Huan amo ximomijmiquilojquetztinemican san. Ta, ximomachtijtinemican de queniu cachi oc huelis nancjsicatacamatisque ne chipaucanemilis ten Totecotzin Cristo quimonequiltfa que xicchihuacan.¹⁸ Huan no namechilá que amo ximohuintijtinemican porín njín

tahuanalís namechuicas sayó tech in ne ixpolihuilis. Ta, cachi cuali monequi xiyolpexontinemican ica in Yecticatzin Espíritu.¹⁹ Huan ximonojnotztinemican se huan ocsé ica salmos huan ica himnos huan ica cantos ten namechmactilá in Yecticatzin Espíritu. Huan ica namocanto xicmohuistilijtiyacan in Totecotzin Cristo ica nochí namotalnamiquilis.²⁰ Huan no cachi oc xictasojcamachilijtiyacan in Totajtzin Dios ica por nochí ten Yejuatzin namechseliltiji ica in chicahualis den tocaytzin Totecotzin Jesucristo.

Nican tajtoa de queniu ximopialijtiyacan mohuisyot se huan ocsé de namochancahuan

²¹ Huan no namechilá que ximohuiscapohuacan se huan ocsé de namejuan nanchanyetoni, porín namejuan nanquimohuistilijtinemij Totecotzin Jesucristo.²² Huan namejuan, tesihuahuan, monequi ximotecahuilican ma namechynecanacan namoyoquichuan, ijcón queme namotecahuiláj ma namechynecana Totecotzin Cristo.²³ Porín teyoquich ma quiyecantinemi isihuau ijcón queme Cristo quinyecantinemi itaneltocacahuan. Huan nochí tejuan tiitaneltocacahuan de Cristo tisepanpoutinemij ihuan Yejuatzin porín Yejuatzin Totemaquixtijcatzin ijcón queme nochí toomiyohuan sepan majsitinemij tech tonacayo.²⁴ Huan cuali ticmatij que nochí itaneltocacahuan de Cristo, yejuan nojonques motecahuilijtinemij ma quinyecana Totecotzin Cristo. No ijcón monequi que in tesihuahuan ma motecahuilican ma quinyecanacan ninyoquichuan tech nochí ninnemilispan.²⁵ Huan namejuan nanteyoquichuan, monequi xiquintasojtatiyacan namosihuahuan

ijcón queme Totecotzin Cristo quinylatasoja itaneltocacahuan. Huan Cristo Jesús quinteltasojatc nochitaneltocacahuan hasta motemactij ma quimictican para quixtahuas den nintajtacoluan itaneltocacahuan.
26 Huan ijcón quichihuac Cristo para quintamiyolchijchipahuij itaneltocacahuan de nochitintajtacoluan. Huan Cristo techyolchipahuij ya ica in Itajoltzin de Dios. Huan tejuan titenextijtinemij que tiyolchipauque ya cuac timotecahuij ma techahuican ca at. **27** Huan Cristo techyecolchipahuij para ijcón techtenextito iixpantzinc Totajtzin Dios que tejuan titaneltocacahuan ma timocualnextican queme Cristo. Huan ma amo ticpixtiyacan nojón tzojcuiltilis den tajtacol. Ta, ma timochihuacan tiyolchipauque queme se istac tilma ten amo tzojcuiltilis huan nión ma taquejquelpachol elihuis. Huan ijcón tiyectamatosque queme Cristo huan amo teyi techpolojojyás oce de ne yolchipahualis.

28 Huan no ijcón monequi que in teyoquichuan ma quintasojatinemican ninsihuahuan ica ne tetasojtalism tenica cada se teyoquich mopialitinemi huan motasojatinem. Porín ne teyoquich ten quitasojatinem isihuatzin, yejua nojón no mopialitinemi huan motasojatinem yejua san mismo.

29 Huan amo aquen quitahuelitzinemi de yejua itacayo san. Ta, cada se tagat motasojatinem cuac motequipanoa huan moyeçpia. Huan no ijcón Totecotzin Cristo quichiutinemi porín Yejuatzin techtasojatinem huan techyecipxtinem nochit tejuantiiitaneltocacahuan. **30** Huan Cristo ijcón quichiutinemi totech porín nochit tejuantiiitaneltocacahuan de Cristo tipoutinemij ihuantzin ijcón queme nochit toomiyohuan poutinemij ihuan tonacayo. **31** Ica ya nojón in Tajtoltzin

de Dios quijtoa ijcuín: "Que in tagat ma quincahuas nitat huan ninan para ijcón mosentilis ihuan isihuau huan ijcón yejuan in ome mochihuauquij sansé ya iixpantzinc Totajtzin Dios". **32** Huan nijín tajtolis de semanicuani semi hueyi tamachilis tenne achtopa motaatijtihualaya. Porín amo aquen moajsicamatiltij que se namicuani yejua ne se nexcutil de Cristo ihuan itaneltocacahuan. Huan amo no aquen moajsicamatilij de queniu itaneltocacahuan de Cristo poutinemij ihuan Totecotzin Jesucristo. **33** Pero ocsepa namechilí que cada se teyoquich monequi quitasojtas isihuau ijcón queme in teyoquich mopialitinemi yejua mismo ica ne yec tetasojtalism. Ica ya nojón cada se tesihuau monequi ma momohuiscahuica ihuan iyoquich.

6 Namejuan ten nanconetzitzin, monequi xiquintacamatiyacan namotatuan para ma ijcón ixnestiyás que nantacuautamatij ihuan Totecotzin porín ijcón namechnamiqui xichiutinemican. **2-3** Huan in tanahuatil de Dios quijtoa ijcuín: "Xicmohuistilijtu motajtzin huan monantzin, para ijcón tiyolpactinemis huan ijcón tinentinemis míac xihuit nican talticpac". Huan nijín achto tanahuatil techyequilá que ticselijtiyasque itatiochihualis de Dios, como tictacamatinemisque.

4 Huan namejuan nantetatme, amo xiquinyolcualantican namocone huan cuac nanquinequij nanquinmejmelahuasque. Ta, cachí cuál xiquinmachtiijtiyacan huan xiquinmelautiyacan ica mohuisoyt. Huan como ijcón nanquichihuasque, ijcuacón nanquitacamatiyasyne que namocone huan ma tacuautamatiyacan de Totecotzin Jesucristo.

5 Namejuan nantaquehualme, xiquintacamatinemican ica nejmach namopatrónes de nican talticpac. Huan

xiquinpialijiyacan mohuisyot. Huan ximotequitiltjinemican por yejuan ica nochí namoyolojuan queme yesquía nanmotequitiltjinemij para Cristo.⁶ Huan namejuan xiquintequitilican namopatrónes amo sayó cuac yejuan namechitztocque para cachi oc nanquiyolpactaj. Ta, cachi cuali xiquintequitilican namopatrónes ica nochí namotalnamiquilis porín nanitequiticahuan de Cristo. Huan ijcón melau nanquichiutinemisque ten Dios quimonequiltá. ⁷ Xiquintequitilican namopatrónes ica cuali tanejnequilis. Huan xiquintequitilican namopatrónes queme yesquía nanquitequitillaj Cristo, huan amo sayó talticpactaca san. ⁸ Porín namejuan cuali nanquimatinemij que se tocniu taneltocacque de Cristo quiselis tetayocolil imacotzinco Totecotzin Cristo, ijcón queme yejua motequitiltj ica ten cuali. Huan cada se taneltocacque ten cuali tequitique, yejua ne quiselis ne tetayocolil masqui yejua taquehual tanamac oso masqui taquehual ten amo tanamac.

⁹ Huan namejuan ten nanopatrónes, monequi xiquinpialican mohuisyot ne namotaquehualuan. Huan amo xiquinmomoutican para nanquinchihaultisque ma cachi oc motequitiltican. Porín cuali xiquelnamiquican namejuan que nochí namejuan nanopatrónes huan nantaquehualme, nochí namejuan nanquipixtinemij sayó se Namotecotzin. Huan nijín Yejuatzin in Cristo ten yetica ne eluiyactzinco. Huan namejuan no cuali nanquimatiq que Yejuatzin amo quinchichicotasojtatiu in talticpacuani cuac quinixcomacas. Ta, Yejuatzin quinsentasojta nochí in talticpacuani masqui patrones oso taquehualme.

Nican tajtoa de manamicme ten in Yecticatzin Espíritu techmactilía tejuan titaneltocani de Cristo

¹⁰ Huan axcan namechilía, nannotasojcnihuan,

ximoyolchicahuacan huan ximoyolpexontican ica ne chicaucahuvelilis den Totecotzin porín namejuan ihuantzin Cristo nanopoutinemij. ¹¹ Huan ximotaquentican ica ne taquen ten Dios namechmactilá. Huan ximomaaquican nochí ne manamicme ten Dios namechmactilá para ijcón huelis nanquixijxicotiyasque nochí ne tacajcayahualis ten namechchihuilijinemi in amocuali Satanás. ¹² Porín tejuan titaneltocani amo timotehuijinemij ihuan talticpacuani san. Ta, tejuan timotehuijinemij ihuan ne amocuali tayecanani huan ihuan ne amocuali chihuamine. Huan no timotehuijinemij ihuan ne amocuali tanahuatiani den taquitzquijtocoque nican talticpac campa sayó ongac tayohuayanilot, porín momautoc de tajtacol. Huan no tejuan titaneltocani timotehuijinemij ihuan nochí amocuali chicaejecame ten taquitzquijtocoque tech nochí in lugares de eluiyactzinco.

¹³ Ica ya nojón monequi ximoaxcatilican nochí ne manamicme ten Dios techmaca para ijcón huelis nanquixijxicosque cuac in tonal namechtajyohuultis in amocuali Satanás. Huan cuac nanquitamixjicosque ya den amocuali Satanás, ijcuacón nanmocahuasque ya nantatanini ya, porín nanquixtopeueque ya in amocuali Satanás. ¹⁴ Amo xiecholohuilican in amocuali Satanás. Ta, xicyecyetocan. Huan nicnequi namechmachtis ica se nexcuítgil ijcúin: Ma timoquemiloltican ica in melahuac Tajtoltzin de Dios ijcón queme se soldado cuac yequin motajcoilpía ica ne cuetax tenica para mopalehuis tech ne netehuilis. Huan no ma timoquemiloltican ne yolchipahualis de Cristo, ijcón queme se soldado cuac yequin motaquentía ica se tepos camisa

ten monotza coraza, tenica mopalehuía campa nielpan tech ne netehuilis.

15 Huan no ma timoquemiloltican ne cuali Tajtoltzin de Dios ten cualcui ne yolsehuilis ihuan Dios. Porín cuac ijcón ticchihuaj, ijcuacón queme yesquía timotalilíaj tegacme tenica in soldado mopalehuijtinemi tech ne netehuilis.

16 Huan ma timoquemiloltican ne hueyi tacuautamatilis de Cristo. Huan ijcón cuali huelis ticxixicojtiyasque nochí tataman cuejmololis tenica in Satanás quinequi techyolxocolis. Porín yejua ne totacuautamatilis queme yesquía se tepos yohuáltic ten monotza escudo, tenica in soldado mopalehuía tech ne netehuilis. **17** Huan no ma timoquemiloltican ica in Tajtoltzin de Dios de que Cristo Jesús techtamimaquixtis. Huan cuac ijcón ticchihuaj, ijcuacón timocuatalilíaj se tepos sombrero tenica in soldado mopalehuía tech netehuilis. Huan no ma timoquemiloltican huan ma timoaxcatilican nochí in Tajtoltzin de Dios. Porín ne Tajtoltzin queme yesquía se machete ten techmactilía in Yecticatzin Espíritu para ica timopalehuijtinemisque tech netehuilis ihuan in amocuali Satanás.

18 Huan no ximotatatautilican ihuan Dios yohualiton huan xictajtanilican Dios huan no ximoteixpantican inahuactzinco Totajtzin Dios ica ne ichicahualis ten namechmactilijtiu in Yecticatzin Espíritu. Huan xiixpetantocan tech namotamachilisuan huan amo ximoyoyolcuepacan para ijcón huelis nanmotatatautilisque ihuan Dios. Huan no xictajtanilican Dios ne tapalehuilis para nochí ne taneltocani ten poutinemij ihuan Totajtzin Dios. **19** Huan no namechonilá ximotatatautilican ihuan Totajtzin

Dios ica por nejuatzin in Pablo para ma Dios nechmacatiu tajtolme cuac nejua nitanojnotztinemi ica in Tajtoltzin de Dios. Huan no ma Dios nechmacatiu ne yolchicahualis para cachi niquinmejmelahuilis in tacaquini ica in cuali Tajtoltzin de Dios ten cualcui ne nemaquixtilis, ne Tajtoltzin ten achtopa ya motaatijtihualaya tech in tanahuatilme den ne huejcautanahuatiani. **20** Huan Totajtzin Dios nechjitat para nitanojnotztinemi itencopaca Yejuatzin ica njíñ Itajtoltzin ten cualcui ne nemaquixtilis. Huan ica por notanojnotzalis axcan nechzacuacque queme nipayo. Ica ya nojón ximotatatautilican por nejua para ma nitetapohuijtinemi ica yolchicahualis de njíñ Tajtoltzin de Dios ijcón queme Dios quimonequiltía ma nicchihua.

Nican Pablo quintajpaloa sequin tocniuhan taneltocani

21 Huan in Tíquico, yejua ne totasojicnitzin huan se cuali tequitique ten motequitilijtinemi ica por Totecotzin Cristo. Huan ne Tíquico namechtapohuiti de nejua huan no namechmatiliti de nochí notequiu ten nicchiutinemi. **22** Ica ya nojón ne Tíquico namechtitanilía para ma yejua namechyequili de queniu titequititinemij para ijcón cachi oc namechyomajxitis. **23** Huan namejuan nantocniuhan, xicselican ne yolsehuilis. Huan no xicselican ne yoltetasojtalism ten cualcui tacuautamatilis. Nochí njíñ xicselijtiyacan imaco Totajtzin Dios huan imaco Totecotzin Jesucristo. **24** Huan Dios ma namechyojicnelijtiu nochí namejuan ten nanquitasojtatinemij Totecotzin Jesucristo ica ne yoltetasojtalism ten amo queman cuetahuís. Amén.